



Formið á aðalfundinum var nýtt, – og undirfélögin fjögur koma sterk inn, – það var gróandi í lofti og nýja orðið valdefling varð áþreifanlegt. Mynd/Védís.

## LÍ tekur yfir rekstur Læknablaðsins

### ■ ■ ■ Gunnhildur Arna Gunnarsdóttir

„Læknablaðið er málagn lækna. Alltaf þegar blaðið kemur út vitna fjölmiðlar í blaðið,“ sagði Reynir Arngrímsson, formaður Læknafélagsins þegar hann lagði málefni blaðsins fyrir aðalfund félagsins. „Þetta er gluggi okkar út á við og tenging okkar við samfélagið. Við þurfum að hlúa að því og taka afstöðu til þess hvernig við viljum hlúa að því í framtíðinni,“ sagði hann um þetta riflega aldargamla fagtímarit lækna, en það kom fyrst út árið 1915.

Aðalfundurinn samþykkti eftir umræðu um blaðið að Læknafélagið tæki

reksturinn yfir og héldi útgáfunni áfram í óbreyttri mynd. Jafnframt beindi fundurinn því til stjórnar að málefni blaðsins yrðu rædd á næsta aðalfundi „og að fyrir þann tíma verði gerð úttekt á útgáfumálunum með tilliti til reksturs og útgáfuforms og möguleikum á frekari hagræðingu kostnaðar.“

Fram kom á fundinum að tekjur blaðsins hafi farið dvinandi vegna færri auglýsinga. „Við þykjumst vita að þetta sé sambærileg þróun og annars staðar. Við höfum orðið þess áskynja að blöð á Norðurlöndunum hafi gengið í gegnum svipað-

ar hremmingar,“ sagði Magnús Gottfreðsson, lyf- og smitsjúkdómalæknir, ritstjóri og ábyrgðarmaður *Læknablaðsins*. Áður en framtíð blaðsins var ákveðin benti hann fólki á að horfa til ábata blaðsins.

„Ég held að oft sé litið á kostnaðinn en ekki ábatann, rétt eins og þegar litið er á heilbrigðiskerfið. Blaðið hefur skilað miklum ávinningi fyrir félagsmenn,“ sagði hann og bætti við: „Blaðið stendur sterkt faglega.“



Aðalfundarfulltrúar snæddu saman á Grand hóteli og við það tækifæri voru heiðraðar fjórar konur í læknastétt: Bergþóra Sigurðardóttir, Guðrún Agnarsdóttir, Helga Ögmundsdóttir og Þórey Sigurjónsdóttir sem var því miður ekki viðstödd. Mynd/Védís.